

RECENZIJA

Škrijelj, R., Grebović-Lendo, N., Madacki, S., Smajlović, D. i Živanović, M. ur., (2024). Univerzitet u Sarajevu (2016-2024) : reforma i integracija. Sarajevo: Univerzitet u Sarajevu.

Monografija “Univerzitet u Sarajevu (2016–2024): reforma i integracija” predstavlja djelo koje osvjetljava izuzetnu sposobnost Univerziteta u Sarajevu da se razvija i prilagođava u složenim društvenim okolnostima. Pod pažljivim rukovodstvom Rektora i njegovih saradnika, nudi se detaljan i sveobuhvatan pregled ključnih reformi koje su oblikovale rad Univerziteta u posljednjih osam godina i pokrenule procese koji su doveli do ozbiljne transformacije Univerziteta u instituciju koja je postala sastavni dio modernog evropskog prostora visokog obrazovanja.

Kroz analizu reformskih procesa i strategija, monografija jasno pokazuje kako je Univerzitet uspješno navigirao kroz izazove koji su se pojavili u dinamičnom društvenom i političkom okruženju. Rukovodstvo Univerziteta, na čelu sa Rektorom, pokazalo je veliku sposobnost da balansira između nužnosti modernizacije Univerziteta u Sarajevu, zahtjeva koje je pred njega postavio osnivač i očuvanja njegove akademske autonomije. Ova je sposobnost posebno očigledna u trenucima kada su česte izmjene i najave izmjena Zakona o visokom obrazovanju zahtijevale brzu i odlučnu reakciju Univerziteta i cjelokupne akademske zajednice.

Rektor i njegovi timovi saradnika uspješno su proveli Univerzitet u Sarajevu kroz brojne procese koji su imale za cilj unapređenje obrazovnog sistema, unapređenje istraživačkih kapaciteta, jačanje institucionalne efikasnosti i poboljšanje kvalitete studija i studentskog standarda općenito. Kroz implementaciju inovativnih obrazovnih programa i usklađivanje sa savremenim standardima visokog

obrazovanja, Univerzitet je uspio ne samo da održi već i da podigne na viši nivo svoju reputaciju kao vodeća visokoobrazovna institucija u Bosni i Hercegovini i jedna od boljih na Zapadnom Balkanu i Jugoistočnoj Evropi. Porast kvaliteta Univerziteta u Sarajevu ogleda se i u činjenici većeg broja dolaznih mobilnosti nastavnika i studenata iz država Evropske unije, kao i povećanom učešću u međunarodnim naučnoistraživačkim projektima (ERASMUS, HORIZON, MEVLANA i sl).

Jedan od ključnih uspjeha predstavljenih u monografiji jeste sposobnost Univerziteta da očuva svoju autonomiju, dok je istovremeno implementirao neophodne reforme u cilju potpune integracije organizacionih jedinica. Ova ravnoteža, koju je rukovodstvo Univerziteta uspjelo da

postigne, predstavlja model za druge visokoobrazovne institucije suočene sa sličnim izazovima. Povećanje finansijske stabilnosti i stabiliziranje budžeta u ovom periodu, dovelo je do poboljšanja životnog standarda svih uposlenika, unapređenja istraživačkih kapaciteta, postizanja naučne izvrsnosti i, kroz stvaranje uvjeta za nagrađivanje akademskog osoblja, publiciranja naučnih rezultata u vrhunskim međunarodnim časopisima obuhvaćenim najznačajnim citatnim bazama. Sve to je rezultiralo iz godine u godinu boljim pozicioniranjem Univerziteta u Sarajevu na značajnim svjetskim rang-listima visokoškolskih institucija, među kojima je i Webometrics rang-lista po kojoj se Univerzitet u ovom trenutku nalazi među 4,5% najboljih univerziteta u svijetu, što je do sada i najbolja pozicija Univerziteta na ovoj rang-listi. Sve pobrojano je samo neki od pokazatelja kako su reforme provedene sa velikom pažnjom i promišljenošću. Bez jasne vizije i plana koji su prethodili, ovi procesi ne bi bili ovako uspješni.

Monografija ne samo da daje detaljan pregled postignuća Univerziteta u periodu 2016–2024 već i pruža dublje uvide u aktivnosti koje su omogućile ove uspjehe. Dubokom analizom dokumenata, fotografijama i pregledom rezultata reformi, monografija postavlja visoke standarde za istraživanje i dokumentaciju sličnih tema u budućnosti.

Imajući u vidu izneseno, bilo je veoma važno da sve što je do sada postignuto, bez obzira što mi svi uposlenici Univerziteta to živimo i

svjedočimo, bude pretočeno u djelo ove vrste koje će trajno ostati kao podsjetnik na jedan period snažnog razvoja Univerziteta u Sarajevu, unatoč veoma složenoj društveno-političkoj situaciji, za buduće generacije ne samo uposlenika Univerziteta nego i studenata, i svih onih koji se bave visokim obrazovanjem kao predmetom istraživanja ili kao donositelji odluka koje oblikuju budućnost visokog obrazovanja.

U zaključku, priređena monografija je djelo koji ističe ne samo uspjehe Univerziteta već i sposobnost rukovodstva u periodu 2016–2024. da upravlja složenim izazovima sa mudrošću i vizijom. Također, monografija daje smjernice i preporuke za budući razvoj Univerziteta, što može poslužiti narednom rukovodstvu ove najznačajnije institucije visokog obrazovanja u Bosni i Hercegovini u planiranju narednih aktivnosti za njen uspješan razvoj. Monografija predstavlja dragocjen doprinos razumijevanju savremenih obrazovnih reformi i njihovih utjecaja na institucije visokog obrazovanja i zaslužuje pohvale za svoj doprinos akademskoj zajednici i širem društvu, zato je toplo preporučujem za objavljivanje.

Sarajevo, 5. septembra 2024.

Prof. dr. Senada Kalabušić